

حلمنا ف الجنة

ما تفكر نيش
أنا قلبي حديد
أنا أبيض خالص من جوا
باتظاهر دايماً بالقوة
مع إني بسيط
الشوق لعينيك نقطة ضعفي
ضحكتك الصافية علي الريق
لمسة إيدك
خفة دمك
العطر الطاير ف كلامك
النسمة الحلوة اللي مصاحبك
النور الساكن ف حضورك

الطيبة اللي ف قلبك بالكوم
وحاجات ياما ماقدرش
أعد ولا احصيه زي الملكات
فكرت ف نفسي كتير أوقات
وحلفت وقُلت إنها لو جات
لا عمل تقلان

التقل يدوب زي السكر
مع أول نظرة حب تجيه
سرها باتع ماقدرش عليه
ماتفكر نيش أنا قلبي حديد

أنا أبيض خالص من جوا
باتظاهر دايماً بالقوة
مع إني بسيط
وحياة الليل اللي جمعنا

من غير مواعيد
وحياة ما جربنا الوقت ساعات
والقمره بترقص م الفرحة
علي أجمل قصه شافتها ف يوم
ونجوم الليل
بتبارك حبنا من النظرة
أحلامنا يادوب لساها خضرة
أسبح ف عيونك بذنوبي
أرجع لابس أبيض ف أبيض
وكأني ملاك
اخذك عل فَرَسِي واطير بيكي
ونكمل حلمنا ف الجنة
مش عايز ولا حاجة م الدنيا
أنا خدت اللي القلب رايدها